

**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI KWAZULU-NATALI UMNUZ WILLIES
MCHUNU EMCIMBINI WOKUVULA UMGWAQO U-P368/P373
EMACHUNWINI EMSINGA MHLAKA 09 MAY 2011.**

Mphathi wohlelo;

INkosi yaseMaChunwini;

Amakhosi aseNdlunkulu wonke akhona;

Imeya yoMkhandlu;

Amakhansela;

Izinduna;

Izisebenzi zoMnyango ziholwa iNhloko yoMnyango uHlabisa;

Amalungu ezinhloko esisebenzisana nazo kwezokuthutha ama-RRTF, ama-CRSC, ama-PTPA, uVukuzakhe noZibambeke;

Imboni yezokuthutha umphakathi;

Abezindaba;

Umphakathi wonke ngiyabingelela.

Masibonge ukuthi nanamhlanje sesiphinde sathola ithuba lokuhlangana nomphakathi walapha eMsinga sizokuthi halala ngentuthuko abantu balapha eMsinga abangasayizwa ngendaba kodwa asebeyibona ngamehlo.

Ngithi sibonga ukuthi sesiphinde sathola elinye ithuba futhi namhlanje, njengoba phela sesifike kaningana lapha eMsinga selokhu siqale uchungechunge lwezinhlelo zethu zokuya emiphakathini esifundazweni sonke ngo-October wonyaka odlule lapho sidlulisela ngokusemthethweni ama-project asephelile bese sizibophezela nakwamanye amasha azokwakhiwa.

Besikhona lapha KwaKopi ngo-October 12 sizovula imigwaqo emibili ethinta iNkosi yaseMaChunwini neyaseMaBomvini. Ngo-December futhi besilaphaya eMsinga Top sizovula umgwaqo u-P1273, nakuba mina ngangimelwe uzakwethu uNgqongqoshe uDkt Sibongiseni Dhlomo, ngalelo langa owayejutshwe nguNdunankulu.

Lapha ngikhuluma ngokufika koMnyango wezokuThutha nje kuphela, kodwa siyazi sonke lapha ukuthi uHulumeni wesifundazwe wonke uphuma ungena lapha eMsinga ngenhloso yokwenza ngcono izimo zempilo yabantu bakithi. Muva nje kuze kwatheleka nePhini likaMongameli uMnuz Kgalema Motlanthe.

Njengoba ngichaza kanjena nje ngizama ukuveza engihlale ngikusho nakwezinye izindawo esizihambelayo ukuthi uma sivula umgwaqo sisuke singachazi ukuthi sesiyahamba kodwa sisuke senza uphawu lokuthi kukhona okunye osekumele sikulethele umphakathi walapho. Siyajabula-ke ukuthi namhlanje nani seningofakazi balokho.

Siyazi ukuthi uMsinga ungenye yezindawo esifundazweni okuthe uma kungena uHulumeni wentando yeningi zahlonzwa njengezidinga kakhulu izidingongqangi ngenxa yezinga lobubha nokuntuleka kwemisebenzi. Imiphakathi yasemakhaya, ikakhulukazi njengalapha eMsinga, ibibhekene nesimo esibucayi kwezomnotho nakuba inamathuba amahle kwezolimo nakwezokuvakasha.

Esiyaye sikuthande futhi sikubonge kakhulu njengoHulumeni emiphakathini yakithi yindlela enisibekezelela ngayo. Siyazi phela ukuthi ngenxa yobukhulu besifundazwe nezindawo eziningi zasemakhaya ezisasilele emuva ngengqalasizinda yomgwaqo, kuyenzeka eminye imisebenzi ithathe isikhathi eside ukuba iqalwe noma iphothulwe emiphakathini yethu.

Lapha-ke eMachunwini kwashesha kwaba lula kakhulu ukusebenza khona ngoba ubukhosi bakhona yibona obuhamba phambili ekushabashekeleni intuthuko, bungabheki ukuthi intuthuko iza nohulumeni ophethwe yiliphi iqembu lepolitiki. Yikho phela lokho esihlale sikushumayela nakwezinye izindawo ukuthi kumele kube nokubambisana ngisho nakohulumeni basekhaya nowesifundazwe.

Kumele iphele lento esiyibona kwezinye izindawo lapho intuthuko ibanjezelwa ngukuthi amakhansela nabasebenzi boMasipala abathile abafuni ukubambisana nemiNyango kaHulumeni wesifundazwe ukuze kubhekwe ukuthi imiphakathi ingasizakala kanjani.

Abantu kumele baqonde ukuthi uHulumeni okhethwe ngentando yeningi waba semthethweni usuke sekungowakho noma ngabe awuholwa yiqembu lakho.

Ngikhuluma nje izolo besihlangene khona laphaya eMatimatolo sikhuluma lona lolu limi lokuthi abantu abafunde ukuhlonipha inqubo yentando yeningi, bazi ukuthi osuke esekhethwe yiningi uyena osekumele ubambisane naye ukuyisa impilo phambili.

Namhlanje-ke singuMnyango wezokuThutha egameni likaHulumeni waKwaZulu-Natali sithe ngoba ingxenye engu-3 km yomgwaqo u-P368 isiphelile ukufakwa itiyela, kuhle siyidlulisele emphakathini ngokusemthethweni.

Imali esisebenze kulo mgwaqo, kuhlenganisa nokufakwa kwenkwali kabusha komunye u-5.7 km walo mgwaqo, isingu-R18 million. Kukhona namathuba emisebenzi angu-64 asedalekile kubantu bendawo. Usuwonke lo mgwaqo uzokuba ngu-26 km ubude kanti uzothatha iminyaka yezimali emithathu. Isiyonke imali ebekelwe lo msebenzi ingu-R40 million, kanti abalelwa ku-220 esewonke amathuba emisebenzi azodaleka kubantu bendawo.

Ngalokhu sisho ukuthi impilo isishintshile emiphakathini yalapha esifinyelela kalula eMbangweni Clinic nakubafundi abaya eMqamathi High School, eFundokuhle High School, eMhlumba Primary School, KwaVulamehlo Primary, eDumaphansi Junior Secondary, eLwazi Primary, eBethulo Primary naseJojingwenya Primary School.

Omunye umsebenzi oxhumene nawo lona ngowomgwaqo u-P373 ongu-38 km ubude ohamba uze uyoshaya enkosini yaBaThembu. Njengamanje sesifake itiyela elingamakhilomitha amabili kanti siphezu komsebenzi wokuthi inyanga kaJuly 2011 iphele sesifake itiyela elingu-4.5 km kulo mgwaqo. Kuyimanje sesisebenzise imali engu-R12 million kwadaleka namathuba emisebenzi angu-60 kulo msebenzi.

Nawo lo mgwaqo uzokwakhiwa ngale minyaka yezimali emithathu ezayo ngemali ebalelwa ku-R50 million unyaka wezimali ngamunye, kwakheke namathuba emisebenzi angu-300 kubantu bendawo.

Nalapha kulo mgwaqo kuzosizakala abantu abaningi abasebenzisa iMahlangana Clinic nabafundi abaya eDlabesuthe High School, eMabizela High School, eMhlakothi High School, eNgongolo Primary School, eMathinta Primary School, eNomahaye Primary School, eMhlangana Primary School, eMahlahlamela Primary School, eMashunka Primary School, eSt Bernard Jolwayo Primary, eMangaliso Primary School, eMzomusha Primary School, eCabangokuhle Primary School, eSibumba Primary School naseMtateni Primary School.

Njengoba ngike ngancoma ukubambisana esikutholayo kule ndawo yamaChunu, kodwa ngiyafisa futhi ukuphinda ngigcizelele kulabo abasuke benikwe igunya lokuqasha abantu ukuthi bangalinge bafake indaba yobuqembu bepolitiki lapha. Uma uHulumeni eletha amathuba usuke ewa lethela abantu bendawo abawadingayo, hhayi amalungu eqembu elithile.

Isikhathi sobandlululo sadlula kudala ngakho-ke akekho umuntu okumele acindezele omunye ngoba engakholelwa kulokho omunye akholelwa kukona. Esikufunayo ngukubona izindawo zasemakhaya zithuthuka ngesivini manje.

Ngifisa ukusho futhi ukuthi ngaphandle kwala ma-project esikhuluma ngawo lapha, kuvele sekunemali engu- R289, 4 million esiyifake ekwakheni nokugcina imigwaqo isesimweni esifundeni saseMzinyathi kulo nyaka wezimali u-2011/12, ingxenye eningi yayo engene ezindaweni zasemakhaya.

Ngaphambi kokuthi ngiphethe, ake ngithathe leli thuba ngigcizelele ukuthi njengoba sazi ukuthi ngesonto elizayo sekuwukhetho loHulumeni baseKhaya, sinxusa yonke imiphakathi ukuba ihloniphe umthetho ngesikhathi sokhetho. Ukuzibophezela emgomweni wokuziphatha okwenziwa ngamaqembu ethu epolitiki ngesikhathi sokhetho, kumele sikubone kuthela izithelo emazingeni aphansi.

Akekho umuntu okumele aphoqe noma asabise omunye noma amphoqe ukuba aqoke iqembu elithile ngenkani ngalesi khathi sokhetho. Ngakho-ke uma kukhona umuntu oniqhathayo odala ukuba nilwe anokwazi ukuthi lowo muntu yisigilamkhuba okumele nisibike kwabomthetho. Umuntu owenza loko kusho ukuthi akayifuni inqubekela phambili, futhi ulwisana nentando yeningi, ngakho kumele abhekane nabomthetho.

Ngalawo mazwi ngithi masibambisane siye okhethweni sikhululekile.

Ngiyabonga.